



PM Modi-i tayimtsü tsükokba
tesem aser hospital semdang

Duterte-i ICC dang
pa chioktsü asüngdang



Diphupar nung Dimapur Airport ali atsünga agia aliba meyipa agir

Dimapur, June 13, 2025 (TYO): State sorkari tetuyuba agütsüba ama Dimapur aser Chümoukedima district administration aser police-Airports Authority of India committee züngsemtemi Hokolbarnü Dimapur Airport ali atsünga aliba meyipa agitsü mapa inyakogo.

Dimapur Airport ali acre 17.9 meyipa agitsü atema iba mapa inyaka liasü aser Dimapur o Chümoukedima nungi independent observers lia iba mapa inyak.

Independent observers rongnung Dimapur aser Chümoukedima nungi kin teloktem, CSOs aser temeket aliba Village councils dena liasü.

"Iba tesem nung alirtemi anema menokdak aser parnok teimba kati pei pei ki azüngteter liasü" ta Dimapur Deputy Commissioner, Tinojongshi Chang-i ashi.

"Nisung 22-i ali atsünga agi saka kiojen 24 liasü. Iba nung RCC buildings 4, semi-pucca building 3 aser thatch houses 17 dena liasü. Parnok nem anogo 15 agütsü aser iba sülen ano grace period agüja liasü" ta DC Tinojongshi-isa ashi.

Airport ali nung Assam Rifles Training Centre (3rd mile) aser CRPF camp aliba atema mapa balaka inyaktsü. Assam Rifles dang ARTC Shokuvi-i belentsü tetuyuba agütsüogo ta paisa metetdaksü.

Dag No, 79 ji Ekranipathar



kübok liasü saka tang Dag No. 30 aser 40 nung atsünga agir liasü. Iba ya Diphupar area kübok lir aser sorkar aliji alir Airport Authority ket nung agüjadoker liasü ta Deputy Commissioner-isa ashi.

Nisung kati kulikakettem yanglushi aser iba ya documents aika nung over-writing aliba ajanga puteter. Iba document nung bighas 27 ta aliba 47 ta melener liasü aser iba ya ozüingi memelaba inyakyim ka lir ta paisa ashi.

2012 nungi 2015 tsünga ozüing alema ali atsünga agiba bushisüngdang asütsü atema police-i SIT ka tentetogo ta DC

Tinojongshi-isa ashi.

"Parnok ket nung ali documents ji Ekranipathar village indang liasü saka ali yabo Diphupar village nung Dag No. 38 aser 40 lir" ta Chümoukedima Deputy Commissioner, Polan John-i ashi.

Dimapur Deputy Commissioner-i December 5, 2019 nü Nagaland Eviction of Persons in Authorized/ Unauthorized Occupation of Public Land 1971 nung Section 51 kübok tetuyuba ka agütsür liasü. Iba nung ali atsünga agir nisung 22 dang anogo 15 tsünga parnok anema eviction order

kechiba meinyaktsü telangzüba meshi, ta Polan John-i ashi.

Anogo 15 tembangba sülen Act nung Section 6 1 kübok eviction order ka agütsü aser idakji nisung 22 dang Diphupar nung 38 aser 40 agi mekazüka ayuba public ali toktsür aotsü shia liasü ta Polan-isa ashi.

Guwahati High Court-i interim order ka agütsüba nung status quo alitsü shia liasü saka state sorkari interim order nung temelenshi kar asütsü asüngdang aser ibaji high court-i January 8, 2020 nü agizüka status quo agiena obendang agütsü.

Dimapur DC Office-i

December 11, 2020 nü anogo pungunü extension agütsü saka eviction drive meinyak tsünga Civil Judge Dimapur-i temporary injunction ka agütsü aser ibaji Principal District and Sessions Judge Dimapur-ia pusema nungit ta Chümoukedima DC-isa metetdaksü.

Ajisüaka, Guwahati High Court Principal Bench-i May 27, 2025 nü ali atsünga agir nem agüja aliba temporary injunction agien aser iba ajanga December 21, 2019 aser December 11, 2020 anogotem eviction orders agüja aliba ama mapa inyaktsü lenmang lapoktsü ta paisa ashi.

MGNREGA sen katizükba bushisüngdang asütsüla: ACAUT Nagaland

Dimapur, June 13, 2025 (TYO): Against Corruption and Unabated Taxation (ACAUT) Nagaland-i 2017 küm RD Dept./ BDO Chumukedima-i MGNREGA funds katizükba anema FIR ka benoka liasü saka yimdaklirtemi kuli agütsütsü memulungba agi iba ken o inyaka moutet ta Media Cell, ACAUT-i metetdaksü.

Rural Development (RD) Department-i MGNREGA funds katizüka agiba dak sendakba nung Kacharigaon (Phevima) Village Council (KVC)-i tai tongloksüba sülen ACAUT-i Hokolbarnü iba sangdong agütsüogo.

Nagaland nung yimtsüng 1285 nungi yimtsüng kati dang küm aika timtema aruba tebilemtsü yimjak nung metetdaksüba atema süngmanger. KVC-i tasü itta noktakba atema tenüngsang

agütsür aser Nagaland nung tanüngba yimtsüngtemia RD department ajanga ochimashi inyakba ya yimjak nung sayutsü mepishir ta ACAUT Nagaland-i ashi.

Iba ochimashi inyakba ketdangsürtem ajak mapa nungi anentsütsüla aser sorkari iba tebilemtsü agentsü atema bushisüngdang tajung ka asütsü ayongzüker ta parnokisa metetdaksü.

Sorkar aser RD department-i teinyaktsü shitak meinyakra ACAUT Nagaland-i ozüingi melaba ama mapa inyaktsü aser central agencies aser central government dangia ken o abentsü ta ACAUT Nagaland-isa metetdaksüogo.

ACAUT Nagaland-isa arogotem, civil society organizations aser lanur teloktem dang iba temenen mapa anema ola adoktsü mepishigo.

HSLC & HSSLC Examinations nung takok tajung angurtem tushi

Dimapur, June 13, 2025 (TYO): Sorkar school tem nungi HSLC aser HSSLC Examinations 2025 nung takok tajung anguba kaketshirtem nem tenüngsang agütsüba sentong ka Directorate of School Education (DoSE)-i ayongzüka agiogo.

Iba sentong ya June 13, 2025 nü Morung Conference Hall, DoSE nung agi.

Iba sentong nung School Education and SCERT Advisor Dr. Kekhriehuoilie Yhome-i tetushi süa jaoker ama shilem agi aser Youth Resources & Sports Advisor S. Keoshu Yimchunger-i pa meina aru.

Takok tajung anguba atema kaketshirtem, teayurtem aser ketdangsür ajak nem tenüngsang agütsür. Sorkari senotsü jenjang, kin mesüra tamangba yimsü telemsa kecha melii ajak nem shisaliok agütsür aser linük nung school tajungtem den kasa asütsü

meranger ta Advisor Yhome-i ashi.

HSLC aser HSSLC examinations nung sorkar school temi high pass percentages anguba atema principal aser tesayur ajak nem tenüngsang agütsür. Sorkar school tem nung HSSLC overall pass percentages ji Arts stream nung 80%, Commerce nung 78% aser Science nung 72% liasü. Iba ya taküm nika school temi anguba den kasa liasü ta Dr. Yhome-isa ashi.

Department-i tesayurtem atema leadership training, Artificial Intelligence & machine learning tenzüksü sentongtem lir. Department-i 2030 tashi nung Government schools nung kaketshir lakh 1 anir arutsü alizüng yua lir. Iba alizüng ya lokti aser tesayurtem den yaritepa atongtsü ta pai ashi.

"Government schools nung kaketshirtemi takok tajung anguba atema tenüngsang

agütsür aser maneni takoktem angutsü atema merangtsü ajungshir" ta School Education Principal Director Shashank Pratap Singh, IAS-i ashi.

Department-i primary school nungi higher secondary aser colleges tashi scholarships ajanga kaketshirtem yarir ta pai ashi.

Kaketshirtemi tajungtiba akümtsü merangba atema tenüngsang agütsür aser maneni tarutsü nunga alizüng temaba ayutsü ajungmesor ta School Education & SCERT Commissioner & Secretary Kevileno Angami-i ashi.

Government school nung kaketshirtemi infrastructure tajung meliaka aser tesayurtem agi anüngaka kaketshirtem aser tesayurtemi kanga merangba aser bendanga agütsüba ajanga takok tajung ngutetogo. Kaketshirtemi maneni tarutsü nunga konang bentsür arutsü amanger ta Kevileno-isa ashi.

(Maneni ttapak 8 nung...)

Süngratsü kaketshirtemi par yimdak tongti lenmang yanglushir



Mokokchung, June 13 (TYO): Alima dang tatishitsü tajung sayua Süngratsü Students' Union (SSU)-i par yim tongti lenmang yanglushiba maparen ka tenzükogo. Iba mapa ya May 24, 2025 nungi par yim süngküm tanabuba nungi tenzuka leper tashi - aji kilometer ana (2) shi asütsü, iba mapa tatem leni arudar, ta

osang ka ajanga metetdaksü. Iba lenmang tesüsabuba yanglushibaji 2014 küm liasü, joko lenmang kanga mejungi raksar nüburtem timtemba ngua, SSU-i parnok sanen luden senden ka nung yim lenmang yanglushitsü lemtet aser aji mapa küma inyaker, ta SSU tir, Tekameren Aier-i metetdaksü. Iba maparen inyakdang

Süngratsü Baptist Arogo, Süngratsü Watsü Telen, kija, kidong aser shirnokisa tenla balala mulungsoa agütsüogo, ajak dang pelar, ta SSU tirisa ashi. "Parnoki mulungsoa tenlaba ajanga iba mapa ya asangsang akümer", ta ashi. Iba den ano kaketshir shirnokisa angati nübu tenlatepogo, parnok danga kanga pelar paisa metetdaksü.

Kohima district nung TB aser HIV azüoktsü atema senden amen



DC Kohima, B. Henok Buchem, NCS den office ketdangsürtem senden temer agiba noksa.

Dimapur, Aami/June 13 (TYO): Kohima District TB Forum, District AIDS Prevention and Control Committee, aser District Community Resource Group senden ka June 13, 2025 nü Deputy Commissioner, Kohima indang Conference Hall nung mena liasü.

Iba senden nung Deputy Commissioner, Kohima, B. Henok Buchem, NCS menden liasü aser pai COVID-19 wave mezüngbuba mapang pa Secretariat nung inyaka alidang ajangshiba lemsatepa liasü.

Pa nübur tenzükba mapa inyakdang COVID-19 menaba aser ICU nung anogo 15 amungba indang bilemteta jembi.

Iba mapang healthcare workers temi teimla aser taneptsüba bener arutsüba indang bilemteta medical professionals temi taneptsü anguba nung tongti shilem agiba indang lemsatep aser stakeholders ajunga dang pei mapa kisüng masü saka nübur tenzüksü mission ka ama maneni inyaksü ajungshia liasü.

Dr. Chibenthung Kithan, District TB Officer ajanga National TB Elimination Programme (NTEP) aser 2025 tashinung India nung tuberculosis samadaksütsü iba sentong nung nükjidong aliba

indang rasaa ashi.

Pai memonui tashidak angati tendanga anepaluba, aser NikshayPoshanYojana kübok achi-ajemsü agütsüba indang rateta ashi.

Kohima district nung FY 2024-25 atema TB cases tejangja 613 lir aser treatment nung takok anguba rate shilem 84 lir. District nung nüburtemi shilem agitsü ajungmesoa aser awareness agütsütsü mechi Pradhan Mantri TB Mukta Bharat Abhiyaan aser TB Mukta Panchayat Abhiyan sentongtem mapa kuma inyaker.

NikshayMitras (community donors) ajanga TB agi shiranger nisung 240 nem teyari tali agütsüogo aser yimtsüng 12 nung TB mali ta sangdongogo.

Sentimongla Tzudir, District Program Officer, DAPCU ajanga district nug NACO ajanga yangluba DISHA tasa kübok HIV/AIDS response indang lemsatepa liasü.

Tang Kohima district nung item services ya ICTCs, ART centres aser OST clinics densema facility balala ajanga ketdang asür. FY 2024-25 nung nisung 13,700 dak tema tendangogo aser nisung 236 dak HIV putet, ta lai ashi.

Schools, colleges, yimtsüngtem aser dictrict jail nung awareness aser outreach sentongtem ayongzüka agiogo

asert Hornbill Festival mapanga campaigns agia liasü. Terenlokba liaka India HIV Estimates 2023 nung Kohima ya high-priority district nung dena lir, aser adult HIV prevalence rate ya shilem 1.432 lir.

Iba senden nung District Community Resource Group (CRG) indanga jembia liasü aser community sasap nung ken o balala bentetba nung shilem agitsü, meshi ama züngshiba ajemdaksütsü aser high-risk groups aser HIV keta aliba nisung nungi nübu shimteta service agütsüba nung tashi itshtsüba nung rangloker jembia liasü.

HIV, STI, TB aser sendaktepa aliba ozüngtem nung inter-departmental awareness session agitsü asoshi sorkar department tem den osang lemsateptsü indang onük benoka liasü.

Ano HIV tashidak keta aliba aser iba tashidak agi kongshir aliba tanur asoshi ICDS nungi chiyongtsü teyari agütsütsü indanga benoka jembi, kechiaser tang Kohima nung iba tashidak keta aliba tanur toku aser tashidak agi kongshir aliba tanur 55 lir.

Iba senden nung TB champion kati District TB Centre teyari nung iba tashidak nungi taneptsü anguba kuli tajung agüja liasü.

ADC Peren-i senzüsemponger dang tekumandangtsü metetdaksü

Dimapur, Aami/June 13 (TYO): Upper Old Jalukie nung National Highway 129 A (Package 2) nung tawa alinen aluba ajanga lenmang nokdangba mechi Additional Deputy Commissioner, Peren, D. Robin, NCS ajanga senzüsemponger dang tekumandangtsü metetdaksü. Nüburtemi iba lenmang

paidoka Bana ward, Peren Town ajanga Old Jalukie (Peren Town nungi Jalukie aoba lenmang tejenba) lenmang nung jajatsü ayongzüker, ta sangdong ajanga ashi.

Tarutsü nung osang magütsü tashi senzüsemponger ajak kanga kumdanga iba lenmang nung jajatsü ajungshir, ta sangdong ajangasa ashi.

Dimapur nung kinü tanur tasü mang ka ngutet



Dimapur, Aami/June 13 (TYO): State Stadium, Dimapur nung kinü tanur tebur ka sozükli yuja aliba nguteta lir, ta June 12, 2025 anüngdang 11:20 ako meta Dimapur West Police Station Duty Officer nungi telephone ajanga osang ka arua liasü.

Osang angazüker Dimapur Women Police Station Duty Party pur iba tesemi arsanga ao aser kinü tanur ya sentsü tamak nung 'dog print' temesüng keta aliba baby blanket ka nung aleper cartoon box sentsü temoro ka

telung nung inoker State Stadium, Dimapur nung aliba ngutet.

Tenük kuli lia yangji ozüng agi melaba maparen ajak tembanga inyakba sülen PM examination/jangjatsü atema temang ya District Hospital Dimapur Morgue nung bener oa lir.

Kibur/kinunger/tembar temi Officer-in-Charge, Women PS Dimapur den mobile number 7085055027 ajanga tongteprateptsü metetdaksür, ta Dimapur Police sangdong ka ajanga ashi.

Dy. CM Y Patton-i Wokha nung sorkar office tem semdang

Dimapur, Aami/June 13 (TYO): Sorkar mapa inyakertem yimya tajung amshidaksütsü aser ochi nung mapa shidak inyakdaksütsü nükjidong nung Nagaland Deputy Chief Minister Yanthungo Patton-i June 13, 2025 nü Wokha nung sorkar indang department balala ajungbensa semdanga jaja liasü.

Mezüngbuba nung Department of Rural Development semdanga Dy. CM-i attendance register tem repranga staff tem ali-mali jangjatepa liasü. Roster nung mapa inyaker nisung 31 nungi 12 mapai arua lias, ana leave nung liasü aser 19 temelaba mali mapai maruba putet.

Anungji pai absentees tem indang itasen nungi taa agizüka ayutsü totuyuba agütsü.

'Present' süa aliba staff tem pei mapa inyakba tesem nung alitsü aser 'present' süa liaka mapa inyakdak tesem nung malirtem 'absent' ama züngshitsü aser parnok indang

itasen nungi taa agizüka ayutsü totuyuba agütsü.

Iba sülen pai Power Department semdang, kong staff 28 nungi asem leave nung liasü aser ka absent liasü. Yangjia temelaba makai mapai marur atema kasa anogo densema taa agizüka ayutsü ashi.

Department of Economics and Statistics nung employees 35 aliba nungi ana absent liasü aser ka leave nung liasü. Iba mapang Patton-i ketdangsür dang mapang shidak amshitsü, leave protocol shidak amshitsü nenshia ashi aser nübur tenzükba nung anogoshi attendance ya tongshi ka amai lir ta ashi.

"Mapa inyaker ajak anogoshi mapai arutsüla. Leave ya official süa jelia agütsütsüla," ta pai ashi.

Pai ano maneni mesangdongi iba ama sorkar indang office tem semdangtsü ta metetdaksü.

Kasa mapang Deputy Chief Minister-i department balala nung timtem ajuruba anga aser nüngdakba mera agitsü ta ashi.



June 13, 2025 nü Ahmedabad nung Ato kilonser, Narendra Modi-i Brihostibarnü Air India tayimtsü tsükokba lendong nung asür, taoba mapang Gujarat chief minister Vijay Rupani'er ki semdanga par kibong züngsemtem ajurudang tangokba noksa nung angur.

Air India tayimtsü indang black box ngutetogo

New Delhi, June 13 (Agencies): Brihostibarnü Ahmedabad nung Air India tayimtsü tsükokba sülen Hokolbarnü ketdangsertemi tayimtsü indang black box ngutetogo.

Black box ji ajanga tayimtsü tsükokba kuli jangjatsü. Black box ji Ahmedabad yimti kübok aliba Meghaninagar area nung BJ Medical College indang tebur hostel kilem kolak nung angu, ta osang angazüker.

"Black box ji kilem kolak nung angu," ta Aircraft Accident Investigation Bureau (AAIB)-i sangdong ka ajanga

metetdaksü.

Civil aviation minister Ram Mohan Naidu-i X ajanga, "Ahmedabad nung lendong atalokba tesem nungji ghonda 28 tsüngda AAIB-i flight data recorder (Black Box) ngutetogo. Iba ya bushisüngdangba maparen nung kanga tongtibang asütsü. Iba tatalokba kuli bushisüngdangba nung iba ya (black box) ajanga tuluka yaritsü," ta metetdaksü.

Gujarat sorkar nungi ketdangser 40 densema AAIB-i ministry of civil aviation (MoCA) teams den yaritepa bushisüngdang tenzükogo.

Ano külen tanga osang ka nung, Britain-ia tayimtsü tsükokba bushisüngdangba maparen nung yariteptsü atema mongin team ka India-i yoktsü, ta metetdaksüogo.

UK Air Accidents Investigation Branch (AAIB)-i bushisüngdangba nung yariteptsü atema Aircraft Accident Investigation Bureau in India dang asüngdangogo.

"India leniba nung bushisüngdangba maparen nung yariteptsü atema onoki bushisüngdangba team ka yoktsü," ta UK AAIB-i metetdaksü.

India aser China na tsüngda direct flights senzütsü bangjemogo

New Delhi, June 13 (Agencies): Hokolbarnü New Delhi nung Foreign secretary Vikram Misri-i China vice foreign minister, Sun Weidong ajurua senden amendang linük ana tsüngda tesendaktep tajungba akümtsü atema jembio.

Weidong-i anogo ananü India semdang.

Senden nungji lenir anati nüburtem tiyongsü südaksür tesendaktep yanglushitsü atema telemtetba agi; iba dak sendakba nung linük ana tsüngda tayimtsütem indangindanga senzütsü (direct flights) bangjemogo.

Senden nungjisa taküm January ita nung China yimtiba, Beijing nung linük ana senden amendang bangjemba asadanga liasü.

Misri-i, taküm Kailash

Manasarovar Yatra asentenshir tenzükba maparen nung China-i amalitepba atema China dang pelaba lemsatep. Yaküm linük anati iba dak sendakba nung onük 6 renema liasü.

Misri-isa taküm April ita nung 'Expert Level Mechanism' atema senden amenba mapang nung linük anapronglai hydrological lemsatepba den külemi lenla balala nung amaliteptsü bangjemba atema pelaba lemsatep.

Hokolbar senden nungji lenir anati tongtibangsa tekeraba nung direct flights senzütsü aser Air Service Agreement renemtsü atema jembia liasü.

Lenir anatisa visa inyakim tezübaba akümtsü atema jembia.

Linük anatisa linük ana tsüngda tesendaktep yangluba sülen küm 75 ajungbamong nüngtem nung renemba

mapatongtem asadangogo.

Iba dak alia India aser China nati shishilembaba aser rongsenkettzüng dak sendakba nung senden amentsü aser lenla aika nung amalitepa inyaksü bangjemogo.

Linük ana tsüngda tesendaktep yangluba sülen küm 75 ajungba nüngtem nung taküm April ita nung India Tir Draupadi Murmu aser Ato kilonser Narendra Modi nati China Tir Xi Jinping aser Ato kilonser Li Qiang na ajurua senden mena liasü.

Iba mapang nungji China ambassador Xu Feihong-i ayongzükba sentong ka nung Vikram Misri-a aden.

Iba sentong nungji Misri-i, linük anati bangjemba amaji atangji mapa küma inyaktet nungbo iba sentong akaba tetezü kanga akettsü, ta metetdakja liasü.



June 13, 2025 nü Mumbai nung aliba Chhatrapati Shivaji Maharaj International Airport nung tayimtsü aika anendena aliba noksa nung angur. Israel aser Iran na tsüngda tensa tamajungba akümba aser Iran-i parnok indang airspace shibangba ajanga India nungi senzüka tayimtsü aika thinen aser karbo meyipa aruogo.

PM Modi-i tayimtsü tsükokba tesem aser hospital semdang

Ahmedabad, Aami/June 13 (Agencies): Brihostibarnü Ahmedabad yimti nung Air India indang tayimtsü ka tsükokba sülen Hokolbarnü Ato kilonser, Narendra Modi-i tayimtsü tsükokba tesem semdang aser yimti nung aliba civil hospital-i oa yirua alirtem semdang.

Hokolbarnep pa Sardar Vallabhbhai Patel Airport tonga aoba sülen indangindanga tayimtsü tsükokba tesem jagi ao.

Pai minute 20 shi tayimtsü tsükokba tesemji asadanga sülen hospital-i ao.

Air India indang Boeing 787 Dreamliner tayimtsüji (A1171) Ahmedabad yimti kübok Meghaninagar area nung aliba B J Medical College indang complex ka nung tsükoka liasü.

Civil Aviation Minister Kinjarapu Ram Mohan Naidu aser Gujarat Minister of State for Home, Harsh Sanghavi nati

tayimtsüji medical college indang tebur hostel aser mess nung tsükokba osang tejanga Ato kilonser Modi nem metetdakja liasü.

Tesülen Ato kilonser civil hospital semdanga tayimtsü tsükokba lendong nungi kümzüksang, Vishwas Kumar Ramesh ajurua jembiba den külemi takoksa angur kibongtem ajuru.

Paisa C7 ward semdanga yirua alir nisung 25 ajuru aser doctor tem den-a jembia liasü.

London-i apusoba tayimtsü nungji taoba mapang Gujarat Chief Minister, Vijay Rupani densema nisung 241 asü aser ka dang kümzüka liasü.

Iba tayimtsü nungji India nunger 168, British nunger 53, Portuguese nunger tenet aser Canada nunger ka asü.

Asürtem rongnung MBBS student pezü aser doctor ka kinüngtsü densema liasü.



Bhopal, June 13, 2025: Muslim nunger temeshi aini aoertem Mecca nungi meyipa arudang Bhopal nung aliba Raja Bhoj Airport nung kinüngertemi parnok agizükba noksa nung angur.

Gaza atema UNGA nung vote agütsütep; India-i shilem magi

New Delhi, June 13 (Agencies): Gaza nung telatetba kecha makai tangsa rara anentsü atema takhangba agüja bangzüng ka renema United Nations General Assembly (UNGA) nung vote agütsütep, ajisüaka India-ibo shilem magi.

Züngsem linük 193 aliba UNGA nung "Protection of civilians and upholding legal and humanitarian obligations" ta ajaba bangzüng draft ji pusema vote agütsür linük 149 liasü. Spain-i benokba bangzüng atema vote agütsütepba nung India densema linük 19-i shilem magi. Vote magütsür linüktem rongnung Albania, Cameroon, Ecuador, Ethiopia, Malawi, Panama, South Sudan aser Togo linüktem-a densema liasü.

Iba bangzüng anema vote agütsür linük 12 dang liasü.

Iba bangzüng ajanga Israel dang Gaza nungi aienshitsü, border crossings ajak lapoktsü aser Gaza nung nüburtem asoshi tangsa teyari lenmang lapokjang ta akhang.

Iba dak alia yaküm June ita nung renemba Security Council bangzüng mapa küma inyakba tangsa rara anentsü, pua alirtem ajak chioktsü, puer oa tepsetba

tasümangtem meyipa agütsütsü, Palestine nunger tepuokdak alirtem melenteptsü, Palestine nunger civilians pei kidangi yoktsü aser Gaza Strip nungi Israel sepaitem aienshitsü akhang.

Tang Gaza nung tensa tamajungba akümba nung ajemdaker iba bangzüng ya benoker, ta metetdaksüba sülen vote agütsütepa liasü.

UNGA nung vote agütsütepba nung India-i shilem magiba dak sendakba nung India's Permanent Representative to UN, Ambassador Parvathaneni Harish-i, "Ken o jembiba aser ketdangsertem tsüngda inyaksangshiba ajanga dang iba rara bentettsü akok, ta onoki jembia arudar, aser tanüa onok kasa tangatetbaji lir. Telok ana (Israel-Gaza) anasaba arutsü atema longjemer inyaksü nüngdak. Item kuli nung ajemdaker iba bangzüng nung onoki shilem magitsü," ta metetdakja liasü.

Harish-isa, India nunger tangatetbaji- ken o jembiba aser ketdangsertem tsüngda inyaksangshiba ajanga dang mangatettep bentettsü, ta ashi.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 14, 2025

Govt aliba metetogo

Nagaland nungbo tashi aketertemi government li agiadokba otsü angashiba dak alaka tashi aketertemi government li tim mesüi agiadokba anema okadak ken o benoka jembir meyipa agiadokba otsü mangashi. Iba jagi ali nung morumorurtemibo government li reprangertem den jembiteper jenjang dalang agi government meyong ali tazüing yua alibatem dang masü saka telidak ki aser kimong dena agir. Iba jagi tanü nisungtem aliba 'residential area' temji khi yutsür government meyong kaketreju, mozü ki, train aser tayimtsü anendak tesemtem tilaba -tilaba küma atsüngsepa agiba angur. Itemji nübortemi tashiyim agi agiba dang masü saka government li repranger aser anükertemi ayoker. Aji oda, government mapa nung government li anüksü mapa agütsürtemji, aika, azü nem shi anüksü mapa lemozütsür amai akümba otsü lir, iba jagi Nagaland agi mathir. Tanü Nagaland tesem aika nung government nung ketdangsertemi government li ayokba agi nübortem asoshi terenlok mapa inyaksü mekoki timtem ajuruba tesem aika lir aser item tesemtem rongnungji nübortem kangasa akoksatsüba tesemji Dimapur Railway station ya ka asütsü. Iba railway station ya Northeast India nung Railway station tejentem rongnung ka lir aser anogo shia oli-orarterem kanga longsua senzüba tesemji Dimapur Railway station yaa ka lir. Ajisüaka, government-i ali temakazük ajungaji jungjunga kümzüka anüksü melen taginer nem agidaksüba ajanga tanübo Dimapur Railway station tuluba aser tajungba küma yanglutsü atema center government-i sen peria lemozükja liaka, Railway pur li nung kiojen yanglua aliba bendoktsü asoshi government-i makok akümba agi, tajungba aser tuluba küma meinyakteti Naga nungertem kanga akoksadagi. Aji oda, Nagaland government-i yimten tashi amshia Railway meyong liji tanaben meyipa magitetra, Dimapur Railway station ya yimtok amai kümadoksü aser Dimapur Railway station melena Karbi Anglong len train station tasen tuluka lapoka asenoki angutsü. Iba station nungi dang asenoka tarutsü nungbo senzütsüsa akümtsü. Iba amajika matalokdaksünüra, Nagaland government-i yimten tashi amshia Railway meyong ali temakazük ajungaji agitetsüla. Atangji, Nagaland nunga government aliba metetsüsa osang tajung kaji, tang Dimapur nung tayimtsü anendak li Airport Authority of India nem agütsür aliba li nisung kari atsünga agir aliba tesemtem tanaben agitetba mapa ya asütsü. Iba mapa jagi Nagaland kanga ajangzüksü, kechiyong, joko, tangbo Dimapur Airport-a tuluba aser tajungba nung International Airport küma yanglutetsü. Aji oda, asen lima nung anüngdang dang masü saka aonung dena tayimtsü aruli oli ta senzütsüsa mapang arudangjibo asen lima nunga kodanga anü mair amai nübortem tanen maka mapa inyaksüsa mapa angutsü. Ibaji kodang bilemdangdir, aseni government li tilaka atsünga agiba ajanga yimkong ajangzüksüba mapa tulu meinyakteti lira, government-i memeindok dang asenoksasa asenoki tenla agütsünüa aittsü. Tanü Nagaland government tashi amshia Airport pur meyong li atsünga agir aliba purtem meindoker tanaben meyipa agiba amaji, Dimapur Railway pur li atsünga agia alibatema tanaben meyipa agitetsüsa Nagaland government-i inyaktetlasang, Dimapur Airport aser Dimapur Railway Station na tuluba aser tajungba küma yangluba kija agi Nagaland nung aliba Naga nungertem kanga ajangzükla. Asenoki asen lima tajungba küma renloknüyonga asen lima nung gari, train aser tayimtsü sademsadema jajatsüsa lenmang aser tanendak melira tangar nüngdak jajartem asen lima nung manentetsü, aser kodang asen lima nung tangar arua manenlir aser asen lima ajanga süier melilir, asen lima nung asenok kija kidangmonger küma alitsü. Aji oda, asenoka maotsü aser tangartema marutetsü ta asüba lima nung alirtemji awatsüng tilaka nung amonger alo telokang ka mesüker asütsü. Tanü limaji awatsüng masü tzüim, ajir majijem, yangji sademsadema asenoka otetsü aser tangartema arutetsüsa asenok dak tangatetba alitsüla.

OLEMSABANG

Metsü (salt) & Stroke

Source - HEALTH & NUTRITION.



STROKE

Tanü asüng nisungtem rongnung 'stroke' asüba agi timtem kanga ataloker, saka shisabulutsü kaji aikati stroke asübaji memeteti dang ataloker. Anungji, nisung ka stroke asübaji kodaser metettsü.

Aiben stroke asübaji nisung ka tekolok tezü nung azü telong kümer junga mejajadaksüi nokdangba ajanga ataloker. Iba timtemji aiben memeteti ataloker, anungji asenoki nisung kar stroke asü südi ta bilemra, pa mesüra la dakji yamai tendangang :

1. Nisungba dangji menütsü asüngdangang aser idangji tejak külen meshitaki angümsüka alur amai angur asü mangur reprangdangang -
2. Nisungba dangji teka anatsülen mekanga atutsü asüngdangang-
3. Nisungba nemji oren ka lephsia jembidakjang aser idangji olongji shitak adoka jembitetter asü mejembitetter aser shitak anidaktetter asü manidaktetter, aji angadangang -
4. Nisungba menüidangji tejak külen angümsüka alur amai reprangtertra mesüra teka külenbo junga mekanga metutet timtemra mesüra o junga arepteta mejembitet aser manidaktet timtemra, pa mesüra laji stroke sür asütsüa akok, anungji tekaratiba nung mozü ki atongtsüla.



Metsü (salt) tali achiba timtem

Aon nung metsü tali enoker achiba agi temang nung timtem adoktsü anameta lir. Metsü tali achiba agi temang nung azü jajaba tezü raksatsütsü aser blood pressure kanga sashia tua adoktsüa akok. Metsü achiba agi uric acid aser albumin tali adokdaksür aser iba jagi azü jajaba tezü raksadaksür ta bushiteta lir. Ano, metsü tali mapang talangka chia aruba ajanga temang nung blood pressure talila tua adoktsü. Iba jagi doctori nisungtem dang metsü kanga ajema achitsü ajungshir aser talisa temulungjang tashidak aketertem metsü kanga ajema achitsüla. American Heart Association purtemibo nisung kati anogo nung metsü mg 1,500 dang achitsü ajungshir. Metsü mg 1,500 ji gram 4 mesüra jamos tila (teaspoon) ka asemsü shilem nung anasü (table salt) asütsü.

Iba Olemsabang nung lemsaba ken-o aser shisatsü ya iba ocet züluri bilemra ken-o ama tazünger angateta agitsü mepishir

Kerala nung police-i Protestant pastor ka anema ken o benok



June 08, 2025 nü Kerala kübok Udayamperoor nung Khristantemi linük balala indang wako amer sarasademtsüdang tangokba noksa nung angur.

June 13, 2025: June 08, 2025 nü Kerala kübok Udayamperoor nung Khristan lenirtem sarasadem sentong tuluka nung Pakistan nunger wako densema amshiba anema Police-i Khristan pastor ka aser sentong ayongzükertem anema ken o benok.

BJP lenir kati tashishiba ken o agütsüba sülen Kochi City police kübok Udayamperoor police-i Jesus Generation Auditorium kibur, Deepak Jacob den sentong ayongzükertem anema ken o benok.

BJP Ernakulam district president Sreekuttan-i video kar nung Khristantem sarasadem sentong nungji Pakistan nunger wako amshiba angu. Khristantem sarasadem sentong agiba video aika social

media nung prokshia liasü.

Sentong ayongzükertemi ashiba agi, linük balala atema sarasademtsütsü asoshi Pakistan nunger wako dang masü saka linük 20 indang wako amshi.

Protestant Arogotem nungi pastor tem Jesus Generation Auditorium nungji adenshia linük balala atema sarasademja liasü.

Police-i Bharatiya Nyay Sanhita (Indian Justice Code) kübok Arrla 196(1)(a) nung ajemdaker pastor den sentong ayongzükertem anema ken o benok. Iba Arrla ya tamangba yimsü nung ajemdaker tesünep raksatsüba nokdangtsü atema lir.

BJP lenirisa, Khristantem sarasademba sentong

tembangba sülen parnoki metsümeshiba tesem ka anasa India wakoji ayu, aser ibaji linük maitsü mezüngmeshiba lir, ta ashi.

Police-isa Khristantem sarasadem sentong nung amshiba wako ajakji pua yuogo, aser itemji court dang kuli sayutsü.

Police den jembidang pastor Jacob-i, Pakistan wako sayabaji tebilemba tamajung nung masü aser tesüiba küm ka ser tesadang nunga Khristantemi linük wako 20 amshia sarasadem sentongtem agiogo, ta metetdaksü.

Paisa, "Onoki linük balala indang wako amer item linüktem nungji tesünep aser azükaru alitsü atema sarasademtsür," ta metetdaksü.

Tesüiba küm 10 tsüngda Khristan nütsüng arenba shilem ajemogo

June 13, 2025: Tang tashi alima nung nütsüng teimba aliba yimsüji Khristan yimsü lir, ajisüaka tesüiba küm ter tsüngda alima nung Khristan nütsüng arenba shilem ajema kümogo, aser ibaji talisa aikati tamang jenjang nungi pilaba agi lir, ta Pew Research Center report ajanga metetdaksü.

Iba report ya census aser surveys 2,700 asadanga renema liasü.

2010 küm nungi 2020 küm tashi nung alima nung Khristan nütsüng million 121.6 renloka liasü, aser tang Khristan nütsüng billion 2.3 shi lir.

2020 küm alima nung nütsüng billion 7.8 shi liasü.

Ano külen Muslim nütsüng-a billion 2 jungogo, 2010 küm nungi 2020 küm tashi nung Muslim nütsüngbo million 347 renloka liasü. Tang alima nung nütsüng tekeraba arenba yimsüji Islam yimsü lir, ta kasa study ajanga bushitet.

Alima nung Khristan nütsüng renlokba shilem ajema akümba tongti kuliji tamangertemi yimsü toktsüba agi lir. Ano kuli kaji, Khristan kibong nung intetba tamangertem aikati Khristan yimsü toktsüba agi lir.

Yimsü kecha nunga affiliate

süa maliba tetezü, Tsüngrem dak mamangertem mesüra Tsüngrem lir asü maliar mejangjartem lir, ta Pew Research-i metetdaksü.

"Alima nung Khristan nütsüng arenba shilem ajema akümbaji 'disaffiliate' asüba agi lir," ta parnokisa metetdaksü.

2010 küm nungi 2020 küm tashi nung alima nung yimsü toktsürtem million 270.1 liasü aser ajak senteperbo billion 1.9 jungogo; yimsü kecha den-a affiliate süa malir nütsüngji alima nung nütsüng shilem 24.2 shi lir.

Yimsü toktsüba mesüra melenba tejangjaba angatettsü atema research agirtemi linük 117 indang surveys asadanga liasü.

"Tesüiba küm ishika tsüngda yimsü melenba metettsü atema onoki arrshi küm 18 nungi 54 tsüngdapurtem data asadanga liasü. Yimsü melenertem teimbaka lanur asüba mapang melenertem lir," ta parnoki metetdaksü.

"Khristantem teimba takoksa nguogo, kechiyong nisung 1.0 shia-i Khristan yimsü dangi meyipdang nisung 3.1-i Khristan yimsü toktsür. Taoba mapang Khristantem aika tangbo yimsü kecha den-

a tesendaktep mali, saka karbo tanga yimsü dangi meyiper," ta parnoki metetdaksü.

2020 küm tashi nung alima nung yimsü kecha den-a sendaktepa maliba nütsüng teimba aliba linükji China lir. China nung nütsüng shilem 90 shibo (billion 1.3) yimsü keccha den-a sendaktepa mali, ta parnoki metetdaksü.

Tanabuba linükji America lir. 2020 küm tashi nung America nung nütsüng million 101 shibo yimsü kecha den-a sendaktepa mali, aser ibaji tesüiba küm ter tejaklen den medemdangra shilem 97 agi teimba akümba lir.

Khristan nütsüng teimba aliba tesemji Europe liasü, ajisüaka tangbo Khristan nütsüng teimba aliba tesemji sub-Saharan Africa kümogo. 2020 küm tashi nung alima nung Khristan nütsüng shilem 30.7 bo sub-Saharan Africa nung liasü. Tang alima nung Khristan nütsüng shilem 22.3 shibo Europe nung lir.

Alima nung linük 120 nungbo Khristan nütsüng teimba lir, ajisüaka aikati yimsü toktsüba ajanga iba tensa kanga keraa melenshidar.

United Kingdom nung Khristan nütsüng shilem 49 dang kümogo, Australia nunga

ANO GO ABEN TSÜNGREM DEN

Abelen mesüra achiji ?

"Aser kodang nenoki tachijilen mesüra tabeleni meyipdir, nenok tenarongi nenok tesülen ola ka shia angashitsü, lenmang ibai lir, iba nung jajaang." (Isa. 30:21).

Kodang tebilemba ka nung teshisadangba ajak lidir telemsa adoker. Teshisadangba shitak mayuba ajanga Khristantem telemsa adoker aser rajang akümer. Lai tesayuba den meputeper. Ibai ozü ka mesüka lir; ozüi tashikang ka kisüngi yima mouteter. Asenoki temeshi Lai tesayuba nung temulung agütsüra aser Tanela Temeshi nem bendanga agütsüra, asenoki pa tenangzükbatem akangtsü akok.

Tanü asenoki iba ochi tenangzükbaba ana indang shisadangdi. Tsüngrem Temeim aser Tsüngrem Ain Adokba. Kodang Tsüngrem ain adokba aser temeshiba kasasa mesülir idakji Tsüngrem tsübuba malitsü. Kangki nung Tsüngrem temeim aser ain adokba pilatsü mokoki sendaktepa lir. Charles Spurgeon shiba dang prince of Preachers ta aja, pai ibai shitak jenjang nung yutsü; "o bendangba nok-i asenok metsübudaktsütsü; saka tsürabur artsüng maneni amshir." Tang aser Tarutsü indang kari Khrista indang shinba ajak dang ataloktsü ama imlar. Kari pa tanaben arudang sentsüwangshi ajak angutsü imlar. Mezüng teloki tanabuba telok dang tepenzür ta ajar. Tasen Lai nung tenangzükbatemala ajakji tang aser tarutsü asoshi. Asenok tanü merüka alitsü akok, saka Kibuba Khrista tanaben arudangdang tabensa akümtsü (1 Yn. 3:2,3; 1 Tesa. 5:23). Kotak obala, Ne yimli asoshi ni dang temsüa alitsü yariang.

Khristan nütsüng shilem 47 dang kümogo, France nung shilem 46 aser Uruguay nunga Khristan nütsüng shilem 44 dang kümogo, ta report nung shia lir.

"Item linük ajak nung yimsü kecha den-a sendaktepa maliba nütsüngji shilem 40 mesüra iba dang nungjagi teimba lir. Item linüktem nung tanüngba nütsüng shilem ishikaji Muslims, Hindus, Buddhists, Yihuda nunger aser tanga yimsü amangertem lir," ta report nung shia lir.

Alima nung yimsü kecha den-a sendaktepa maliba nütsüng teimba aliba linük tasentemji Netherlands (shilem 54) lir, iba sülen Uruguay (52) aser New Zealand (51) lir.

2010 küm alima nung yimsü kecha den-a sendaktepa maliba nütsüng teimba aliba linüktemji China, North Korea, Czech Republic, Hong Kong, Vietnam, Macao aser Japan liasü.

2022 küm Pew study ka ajanga, tang ama arrshi küm 30 ser tekübokpur Khristantemi Khristan yimsü toktsüra 2045 küm tashi nungbo America ya Khristan nütsüng teimba aliba linük ka masütsü, ta metetdakja liasü.

Tang amai America nungertemi Khristan yimsü toktsüra 2070 küm tashi nungbo Khristantem ya minority akümtsüa akok, ta 2022 küm nunga Pew Research Center-i metetdakja liasü.

Pew Research-i ashiba agi, Khristan kibong nungi intetba shilem asemsü-ibo arrshi küm 30 majungdang Khristan yimsü toktsür aser shilem 7-i arrshi küm 30 süiba sülen Khristan yimsü toktsür. Yamai dang ora 2070 küm tashi nungbo America nunger nütsüng shilem 46 shi dang Khristantem asütsü aser tamangba yimsü kecha den-a sendaktepa malir shilem 41 asütsü.

Iba tetezü 2070 küm tashi nungjibo US nung Khristan yimsü ya majority yimsü ka masütsü, ta Pew Research-isa metetdaksü.

Ano yimsü dak sendakba tensa kanga melenshira, mesüra rara tulu adokra, mesüra rongsenketzüng jenjang tamajungba kümra mesüra Khristan yimsü asentenshi tulu adokra, item kuli ajangaji Khristan nütsüng teimba akümba mesüra kanga ajema akümba latettsü, ta Pew Research Center-isa metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tenüngdaksü

(adj) tagitsütem (needs, necessities, useful)


* Ozü nem tenüngdaksü osettem ajak kinungertemi agütsü.

Tenüngla

(n) teret telong nung aliba temo (marrow)

* Shi, angö, mamatzü aser entsü achiba agi tenüngla tashi aiter.

OLONG PAITEP # 7181



TIPIEN

1. Ajurunüa bilem

- (8)

6. Ozü ka tenüng

- (4)

7. Mi apudak

- (6)

8. Taluposa / Jenti

- (4)

11. Mangmang

- (4)

14. Atangji masü

- (6)

16. Ashibangba

- (8)

LANGTSÜNGLEN

1. Tembar

- (7)

2. Tetsü tepok nung tanur
meyibangba

- (5)

3. Meimchir

- (6)

4. Ajungbena tsüba ait

- (5)

5. Teki

- (5)

9. Atsük tapu ka

- (7)

10. Tekangshi / Touashi

- (6)

12. Saklok

- (5)

13. Meshirang / Temang junga

- (5)

aliba

- (5)

15. Arameso

- (5)

OLONG PAITEP # 7180 TELANGZÜBA

TIPIEN :

2. Pongsen, 5. Lepko, 7. Omen,

8. Maongka, 10. Yangkhu,

12. Senpong, 14. Angu,

15. Raksa, 16. Arameso,

LANGTSÜNGLEN :

1. Alimang, 2. Pongen,

3. Samaru, 4. Nün, 6. Pio,

9. Nüngdak, 10. Yongya,

11. Kongro, 13. Ora, 14. Ata.

NAI-A YA METETTER MA



WPP Media-i Hero Cycles den külemi Guinness World Record ka yangluogo aser iba ya "Largest Online Video Album of People Riding Bicycles" lir.

India ajungalen 'Har Gully Hero' ta ser campaign ka agidang nisung 5,800 temai bicycles aniba indang online video album tulutiba yangluteta liasü.

Raj Kushwaha-i Raja Raghuvanshi tepsettsü tasa atong



Shillong, June 13, 2025

(Agencies): May 23 nü Sohara nung Indore nungi shishilembar Raja Raghuvanshi tepsettsü tasa ya Raj Kushwaha-i atong ta Meghalaya Police-i metetdaksüogo.

Raja kinungtsü Sonam Raghuvanshi dena tai tonglokja alir nisung pungu dang asüngdangya asüandang parnoki pa pezübenbuba merandang tepsetba nangzükogo.

"Raj Kushwaha-i tasa atong. Sonam ya pa den teyariteper ka" ta East Khasi Hills Superintendent of Police, Vivek Syiem-i ashi.

Sonam aser Raj naprongi

Raja tepsettsü tasa atongba nangzükogo ta DIG (Eastern Range) Davis N.R. Marak-ia yashi metetdakja liasü.

East Khasi Hills police ajanga tentetba Special Investigation Team (SIT)-i Madhya Pradesh aser Uttar Pradesh police nungi teyari agia tai tonglokja alir pungu- Sonam Raghuvanshi, la tetong Raj Kushwaha, Anand Kurmi, Akash Rajput, aser Vishal Singh Chauhan nunger apu.

Shillong court kati SIT nem parnok anogo 8 nü Meghalaya police ket nung ayutsü temelaba agüja liasü.

Raja aser Sonam na May 11

nü Indore nung kibong akümtsü anogo 11 jelia Raj Kushwaha-i Raja tepsettsü tasa atong ta SP Syiem-i ashi.

Parnoki tesem balala nung Raja tepsettsü merang. Guwahati nung pa tepsettsü merangba tamakok angu. Nongriat nung tanaben merandang saka tasü mang endokdak tesem tajung ka manguba agi metepset. Tasembubaji Mawlikhiat aser Weisawdong tsüngda merangdanga liasü saka idangja tamakok angu ta SP Syiem-isa ashi.

May 22 nü Raja aser Sonam na Sohara atong aser May 23 nü Weisawdong nung parnoki pezübenbuba merandang Raja tepset. May 24

"Sonam-i la tetong yutsür tangar ka den ang kibong aküm. Ketdangsürtemi Raja mang angudang la Indore nung liasü. Raj Kushwaha den yariteper Akash apuba sülen Raj-i Sonam dang la yimjak nung sayutsü tetuyuba agütsü" ta SP Syiem-isa ashi.

Assam CM-i Dhubri nung 'shoot-at-sight' tetuyuba agütsü

Guwahati, June 13, 2025

(Agencies): Dhubri nung kin o kin tsüngda mepetmesü adoka aliba mapang Assam Chief Minister Himanta Biswa Sarma-i "shoot-at-sight" tetuyuba agütsüogo.

Hanuman temple ka nung nashikolak ka anguba sülen mepetmesü adok.

CM Sarma-i Hokolbarne 11:00 ako meta Dhubri tongogo aser law & order tensa

asadangdar.

Circuit House nung CM Sarma-i district administration aser police.ketdangsürtem den senden ka amen.

Senden nung CM Sarma-i Dhubri jila nung shoot-at-sight orders agütsü aser ketdangsürtem dang ozüng alema inyaktertem dak tapet mapa inyaksü tetuyuba agütsü.

Bangladesh nungi nisungtemi Dhubri nung

mepetmesü adokdaksütsü meranger ta Sarma-i ashi.

Bakri Eid mapang Dhubri nung atalokba atema onoki inyakdar. Iba district nung onoki Law and Order tiptema ayutsü aser telemsa adokdaksür anema inyaksü ta pai ashi.

Dhubri nung Eid matongdang beef mafia ka adok aser parnoki shiruru meyirjang aika alizük ta Sarma-isa ashi.

Assam nung ONGC well nung gas adokba manener

Guwahati, June 13, 2025

(Agencies): Sivasagar district nung Oil and Natural Gas Corporation (ONGC) indang crude well ka nungi gas adokba maziüktet lir.

"Iba blowout atema bushisüngdang asütsü tenzükogo. Tensa yashi den kasa dang lir. Iba well nung mi

ano mekaolok lir aser nisung yiruyibong asüba kecha mali. Emergency services ajaki mapa inyakdar" ta ONGC ketdangsür kati ashi.

Iba ya Bhatiyapara nung aliba Rudrasagar oil field, ONGC nung atalok. SK Petro Services ta ser nija company kati ONGC tenüng

nung iba well ketdangsüa aru.

"Well nungi gas adokba anguba sülen ONGC-i standard safety protocols tenzük. Iba tesem nung Asset Manager-i anir emergency response team kati mapa inyaksü tenzük" ta ketdangsüri ashi.



Assam Police-i Sribhumi district nung Rs 6.5 crore shi alang Yaba süngjang 44,000 ngutetba sülen agiba noksa angur. Osang tejangja ka nung ajemdaker Veterbond tesem mita aodang nisung pungu ket nungi Yaba süngjangtem nguteta liasü.

Duterte-i ICC dang pa chioktsü asüngdang



Manila, Aami/June 13 (Agencies): Philippines indang taoba tir Rodrigo Duterte-i International Criminal Court dang pa tain akumba mechi danga linük kati khen atema chioktsü asüngdanga petition agütsür, ta pa indang okatsüri ashi aser jena maotsü mesüra mapa tamajung meinyaktsü nangzük.

Pai temesepba mozü anema raraba dak sendakba nung nisung tepset ta tai tonglokja Duterte ya March ita The Hague-i pua bener ao. Pai iba rara nung temesepba mozü ayoker aser amshir ta temulung melemi alir meyirijang aika tepset. Paibo pa apuba ya ozüing alema lir aser tashiyim agi pua bener aoba den sako lir ta ashir.

Duterte indang counsel Nicholas Kaufman-i ICC indang pre-trial chamber dang 'third country' kati Duterte agizüksü mulunga aliba lemsatepogo ta

ashi. Yimjak nung sangdongba text nung iba linük tenüng agiena liasü.

Duterte ya 'flight risk' masü aser chiokra pai mapa tamajung meinyaktsü, ta pa indang counsel-i ashi.

"Duterte ya Philippines indang tir ka masü aser pai mapa tamajung inyak ta tai tonglokja aliba mapang pai tim masüba nung amshiba tashi pa ket nung mali," ta petition nung shia lir.

Duterte-i Philippines nung ozüing alema amshiba temesepba mozü samatsütsü aser mapa tamajung inyakba azüoktsü nangzüka nübuyimba sülen 2016 küm yimsüsüba mendeni atu. Pa küm trok office nung alidang anti-drug operations mapang temulung melemi alir nisung 6,200 tepset, ta government data ajanga ashir, saka rights groups temi iba dang kanga agi timba tepsetogo ta ashir.

Duterte-i ICC dang mepishiba nung pa arishi küm 80 jungogo ta shia liasü.

Temai madokba terms kar inyakra Duterte khen atema chioktsü prosecution-i anema menokdaksü ta ashir.

Prosecutor indang office-i email ka nung, parnoki ICC pre-trial chamber nung Duterte-i mepishiba nung telangzüba agütsütsü aser iba indang 'public version' ya yimjak nung sangdongtsü ta ashi.

Temesepba mozü anema raraba nung asür tenüng nung nokdaker ICC assistant to counsel Kristina Conti ajanga DZMM broadcaster dang, tetenzük nungi lar clients temi Duterte khen asoshi chioktsü memulungi arur, ta shia liasü.

Pa puaka May ita midterm elections agiba mapang par yimti Davao nung vote aika agi pa mayor shima liasü.

N.Korea leniri warships tali yanglutsü nükjidong lir

Seoul, Aami/June 13 (Agencies): Taoba ita North Korea indang destroyer ka sayaba mapang tzü telungi tesadang ka aluba tanaben sayashiba mapang lenir Kim Jong Un-i warships tali yanglua Pacific Ocean nung ayutsü nangzüka liasü, ta state media ajanga ashi.

Hokulbarnü Korean Central News Agency (KCNA) ajanga ashiba agi, linük far north nung aliba Rajin shipyard nung 5,000-tonne destroyer atema Kim-i anir sentong agi. Iba rong dang North Korean mitkar tanishir ka Korean War nung tepsetsang, Kang Kong tenüng jaloktsü.

Brehostibarnü iba sentong nung jembidang, destroyer yanglushiba ajanga North Korea-i tzüym nung tashi ulushitsü merangba nung memunudaksü ta ashi.

"Hopta ana tsüngta rong mesoa tzüma nung pongdak aser bilemba ama yanglushiba mapare tanü renem," ta Kim-i ashi.

North Korean lenirisa taruba küm 5,000 tonne destroyers ana yanglutsü sentong aliba sangdong aser United States aser par tembar linük temi rara mesüa alidang Pacific Ocean nung tzüym sepai tashi ulushitsü ayongzüka liasü.

"Yakta tsükchir temi asen rong yangluba mener repranga alitsü majung ta angatettsü," ta Kim-i ashi.

"Tarutsü nung asen battleships tem lenmang Pacific Ocean nung 'outposts of aggression' tsütsü lapoktsü ta ni amanger," ta pai ashi.

Tawa satellite ajanga tangokba noksa nung Kang Kon destroyer yanglushiba sayua liasü, koba May ita sayaba mapang tzü nung mükepoka liasü.

Tang semzükba Kang Kon ya North Korea indang destroyer tanabuba alitsü aser ibai Kim-i par linük indang tzüym tashi modern kumdaktsütsü nükjidong nung kanga tongtipang amai ajiteter.

Warship tasenba ya North Korea-i Russia nunger teyari nung yanglua May ita semzükba 5,000-tonne destroyer-class vessel Choe Hyon den mesüktepa lir, ta South Korean mitkari ashir.

Kim-i par military tajungba kumdaktsütsü meranga arur aser US aser South Korea nungi timtem agütsüba nung tashiyim agi langzütsü jembia arur.

US Tir Donald Trump-i Kim den osangtsüsang agiteptsü mulunga lir, ta White House-i Bodhbarnü ashi. Trump mezüing kümsük mapang Kim tena tesendaktep tajung liasü.

Ajisüaka Trump-i Kim dangi züngüba shiti ka New York nung United Nations nung Pyongyang delegation-i magizüker ta osang ajanga ashir.

Middle East tensa tamajungba akumer; Israel-i Iran amak

Tehran, Aami/June 13 (Agencies): Hokulbarnü Israel-i tesem balala nung tenük yoker amakba mapang tepsetba Revolutionary Guards aser armed forces lenir melen nübu tasen Iran indang supreme leader Ayatollah Ali Khamenei-i kanga kera shimogo.

Khamenei-i totuyuba balala agütsüba nung Islamic Revolutionary Guard Corps indang commander Hossein Salami melentsü asoshi Mohammad Palpour shim aser armed forces general staff tekolakba Mohammad Bagheri melentsü Abdolrahim Mousavi shima liasü.

Israel-i fighter jets 200 dak tema amshia nuclear facilities aser danga military installations amakba mechi Tehran-i tayang kepzüksü renemba mapang mitkar lenirtem tasen shim.

Israel-i tesüiba mapang kodanga mangashidangba aser meinyakdangba Operation Rising Lion ajanga Iran indang tongtipang mitkar aser security lenirtem aika takum agi, aser Tehran indang defence establishment atema ibai takoksa tejangjatiba alitsü ta aikati ashir.

Israel-i tepseter tem rongnung Iran indang elite

Islamic Revolutionary Guard Corps (IRGC) commander Major General Hossein Salami ya ka liasü. Iran nung tashi tulutiba military arm - IRGC tekolak ka asünung, Salami ya region nung linük indang military tasa yangluba nung nübu tongtipang ka liasü aser Supreme Leader Ayatollah Ali Khamenei den indang-indanga osang agiteper ka liasü.

Dangar atsüa arua jembitetsang Salami ya Iran nung tashi tulutiba aliba teburtem rongnung ka ta züngshia liasü.

Tejangja asüba nung Major General Mohammad Bagheri ya dena lir, shiba 2016 küm nungi Iran indang armed forces nung chief of staff inyaka arua liasü.

Pa lenisüba kübok Iran mitkar 500,000 dak tema lir, aser item ya General Staff ajanga ketdangsüa anepalur, ta International Institute for Strategic Studies (IISS) ajanga asadangteta liasü.

Kasa mapang Ali Shamkhani-a tepset, shiba senior advisor to Khamenei aser Iran nung yimten yimsüsür tejangja nübu tem rongnung ka lir. Taoba mapang Shamkhani ya Iran indang Supreme National Security Council nung

secretary ka ama 2013 nungi 2023 tashi inyaka liasü aser China tetsüngtai ia 2023 küm Iran aser Saudi Arabia tsüngta tesendaktep yanglushiba nunga pai tongti shilem agia liasü.

Israel mitkari Brehostibar aonung aser Hokulbar anepdang tashi Iran tesem balala nung nuclear facilities aser military sites nung tayimtsü amshia amak.

Jelia tangokba video message ka Hokulbarnep prokshiba nung Israel Ato Kilonser Benjamin Netanyahu-i Iran indang nuclear infrastructure aser ballistic missile factories tem raksatsütsü nükjidong nung amaker ta shia liasü.

"Onok samatsütsü amokmerenba nungi kumzüka alitsüba mapa merenem tashi iba operation alitsü," ta Netanyahu-i ashi.

Israel mitkari The Times of Israel osangkaket nunga "Rising Lion" nüngja agütsür Iran indang nuclear sentongtem anema aerial campaign tenzük ta ashi.

Israel mitkar indang chief of staff, Eyal Zamir-i ashiba agi, Iran indang nuclear sentongtem ya meyipa meshilangtsü jenjang ka tongogo aser onok takum wazüka ayutsü asoshi

raraba nung mera agitsü Israel-i mapang ka arutsü matatettsü.

Mapang tatsüka lir sangdong ka nung fighter jets 200-i linük tesem balala nung targets 100 dak tema amak, ta Israel army-i ashi.

Iran yimtiba, Tehran, Natanz nung Iran indang uranium enrichment tesem tongtiba aser Tabriz nung nuclear research centre ka densema tesem ti nung amakba tangjaogo.

Natanz nung radiation levels timba akumba mesayur, ta International Atomic Energy Agency (IAEA) ajanga ashi. Fordow nung fuel enrichment plant ka tang tashibo mokongshi lir aser Bushehr nung aliba nuclear plant nunga mokongshi.

Iranian state media ajanga asürtem rongnung IRGC commander-in-chief Hossein Salami, Armed Forces indang chief of staff Mohammad Bagheri, nuclear scientists Mohammad Mehdi Tehranchi aser Fereydoun Abbasi nunger dena lir ta ashi. Yasüng amakdang scientist trok tepset ta parnoki ashi.

Israel-i amakba sülen Iran Supreme Leader Ayatollah Ali Khamenei-i Israel dang "tako tia" ka asoshi renema alitsü shia liasü.

Iran Ministry of Foreign

Affairs ajanga ashiba agi, telangzüba agütsütsü Tehran dak temeden lir, kechiaser yangji US dena lir aser parnoki temelaba magütsüibo Israel-i mamaktsü.

Hokulbarnep Israel-i amakba sülen Iran-ia drones 100 shi Israel tsütsüi yokogo aser itemji khazüka yoktsü meranger, ta Israel mitkari ashi.

"Israel litsü-lika tsütsüi Iran-i UAVs 100 shi yokogo, aser onoki itemji khazüka yoktsü mesüra raksatsütsü atema inyaktar," ta mitkar odongtar Brigadier General Effie Defrin-i ashi.

Mapang tatsüka lir mitkar sangdong ka nung Israel-i par litsü alema orr drones nokdang ta shia liasü.

Kasa mapang US Secretary of State Marco Rubio-i Iran amakba nung US maden ta Brehostibar aonung menur ashi aser pai Iran dang region nung American interests mesüra sepiatem dak tenük meyoktsü ajungshia liasü.

"Taonung Israel-i par sasa Iran anema inyaker. Iran amakba nung onok dena mali, aser onok asoshi teinyaktsü tongtipangtibaji region nung American sepaitem kumzüka ayutsü ya lir," ta Rubio-i ashi.

Liverpool-i sen £116m agi Florian Wirtz alizüktsü mulungogo



Liverpool, Aami/June 13 (Agencies): Liverpool-i club otsü yanglua sen £116 million (\$157 million) agi Bayer Leverkusen nungi midfielder Florian Wirtz alizüktsü mulungogo ta osang ajanga ashir.

Osang ajanga ashiba agi, Premier League champions-i tetenzük nung sen £100 million agütsütsü, koba taoba mapang otsü yanglua aliba alemtsü. Pai asayaba dak ajemdaker sen agütsüba ajanga British record yanglutsü.

Liverpool-i arishi küm 22 tain German nungha dak indokba sen ya 2023 nung Chelsea-i Moises Caicedo atema Brighton nem agütsütsü mulungba alemtsü.

Mezüngbo Caicedo asoshi Chelsea-i sen £100 million indok

aser ano £115 million akumtsü teimla lir.

Liverpool-i taoba mapang record yangluba ya 2022 küm Darwin Nunez alizükba ya alitsü, saka add-on requirements ajakbo metongtet nung £85 million ajungabo magütsü.

Manchester City-ia Wirtz dak temulung agütsü, saka package ajunga nung sen tali asüba yong atsüngzüka ao.

Taoba Bayer Leverkusen coach aser taoba Liverpool midfielder Xabi Alonso, shiba tang Real Madrid coach lir, paia Wirtz ya alima nung football asayar tajungtiba rongnung ka lir ta tenüng sanga liasü.

Arne Slot asoshi mezüng season nung transfer market süngjema aliba sülen Reds ya tashi nung sen kanga indoker,

shirnoki Premier League title 20 buba kokteta lir.

Leverkusen nungi Wirtz den külemi asayar Jeremie Frimpong bo Liverpool nung denogo aser Bournemouth left-back Milos Kerkez alizüktsü merangba maparena tatemleni arur ta ashir.

Leverkusen asoshi season tajungtiba nung Wirtz-i tongti shilem agia parnok asoshi mezüngbuba Bundesliga title angu aser 2023/24 nung Alonso kübok game kata nunga tamakok majurui German Cup koka liasü.

Iba season nung parnok asoshi tamakok ajuruba ya Atalanta nung Europa League finals asayadang liasü, aser iba küm Wirtz nem Bundesliga player of the year sempet agütsü.

Taoba küm German football nung Bayern Munich-i tanaben amokbangshi aser Leverkusen ya tanabuba jenjang nung tembang.

Wirtz alizükba ya Slot indang sentong nung apeter asü masüar mejangja.

Pai Leverkusen asoshi 197 ben asayaba nung goal 57 aser assists 65 agütsüteta lir.

Liverpool forward nung asayar peria lir, kong Mohamed Salah, Luiz Diaz aser Cody Gakpo nung lir.

Ajisüaka Diogo Jota, Darwin Nunez aser Federico Chiesa nung asoshi tebilemstü lir, shirnok Liverpool-i ayoktsü akok.

Munich World Cup nung Suruchi Singh-i gold angu

Munich, Aami/June 13 (Agencies): Tang tasayadak Munich World Cup nung India tsür Suruchi Singh-i Hokulbarnü 10m air pistol event nung gold ngua France tsür Camille Jedrzejewski madak 0.2 points agi takok ngua liasü.

Kasa anogo Paris Olympics double medallist Manu Bhaker-i final atema qualify mesütet.

Suruchi asoshi ibai World Cup tasembuba liasü, kong lai individual gold medal asembuba ngua liasü, shibai ita ana tejakdang Buenos Aires aser Lima nung gold ngua liasü.

Final nung Suruchi-i 241.9

points ngutet. China tsür bronze medallist Qianxun Yao madak takok anguba sülen Surchi-i 10.5 ka ngutet aser France tsür silver medal angula Jedrzejewski-i 9.5 dang ngutet.

Tatembang akhaba nung 9.5 ngutetba ya Suruchi asoshi teperi liasü, kong Jedrzejewski-i 9.8 ngutet.

Qualifications nung Suruchi ya points 588 bener tanabuba jenjang nung liasü aser Manu ya points 574 bener jenjang 25 buba nung tembang.

Suruchi-i gold medal anguba atema Manu-ia pelaba lemsatepogo.

Qatar aser Saudi Arabia nung AFC 2026 World Cup playoffs asayatsü

Kuala Lumpur, Aami/June 13 (Agencies): 2026 World Cup atema Asian qualifying playoffs ya Qatar aser Saudi Arabia nung asayatsü, ta Asian Football Confederation (AFC) ajanga metetdaksüogo.

Tawa Asian third round of qualifying nungi tasembuba aser pezübuba jenjang tongteter densema team trok ya groups ana nung team asem-sem sadangtsü.

Parnok ya October 8-14, 2025 anogotem centralised format nung kati ka den asayatsü, ta AFC ajanga Hokulbarnü sangdong ka nung ashi.

Group winners ya World Cup nung anünga aliba automatic berths ana ya agütsü.

Group anaprong nungi runners-up ya November 13 aser 18 nung matches ana asayatsü aser yangji takok angur ya inter-confederation playoffs asoshi qualify asütsü, aser ibaji ajanga World Cup nung spot ka angütsü.

Asia nung qualifying round atema tatembangba draw ya July 17 nü asayatsü. Asayatsü tesemtem ya khen lir sangdongtsü.

Qualifying indang round tasembuba nung team trok aliba groups asem alitsü aser group shia nungi tematiba team ana ya World Cup atema pasasa qualify asütsü, anungji AFC asoshi 2026 World Cup nung slots ti lezmükja aliba trok abensatsü.

Group shia nungi tasembuba aser pezü buba jenjang nung aliba team tem AFC qualifiers tatembangba round-i aitsü.

Item groups nungi

tsünglangba team ana ya eliminate asütsü - Group B nungi Palestine tatemsa tsükogo.

2026 World Cup asoshi Asia nungi Japan ya mezüngbuba qualify süogo, koba United States, Canada aser Mexico nung asayatsü lir. Japan den külemi Group C nung Australia lir, aser parnoki Saudi Arabia den tatembangba asayadang takok ngua jenjang tanabuba tongtet.

Jordan aser Uzbekistan ya pei groups nung tanabuba jenjang nung tembang aser tena jakdang South Korea aser Iraq lir, anungji parnok World Cup nung tang mezüngbuba asayatsü.

Indonesia, Iraq, Oman, Qatar, Saudi Arabia aser United Arab Emirates ya World Cup finals atongtsü asoshi tang tashi teimla aliba team trok lir.

AFC Asian Cup champions aser 2022 World Cup asayamung ayonger Qatar ya Group A nung pezübuba jenjang nung tembang, kong UAE-i tasembuba jenjang tongtet.

World Cup finals nung tanaben buba asayatsü teimla aliba Indonesia ya Group C nung pezü buba jenjang nung tembang. Saudi Arabia ya iba group nung tasembuba jenjang nung tembang, kong China aser Bahrain qualify mesütet.

Group B nung Iraq aser Oman ya tasembuba aser pezü buba jenjang nung tembang.

Asian Cup taruba edition ya 2027 nung asayatsü. Iba asayamung ya Saudi Arabia nung asayatsü, shiri 2034 FIFA World Cup ayongzütsü lir.

STATE OSANG :

Tapak 1 nungi...

HSLC & HSSLC Examinations nung takok tajung...



HSLC aser HSSLC 2025 examination nung Science, Arts, aser Commerce streams nung takok tajung anguba tematiba school asem nem sempet aser kulikakettem agütsü. Mezüngbuba jenjang anguba school nem Rs. 30000, tanabuba nem Rs 20000 aser tasembuba nem Rs 10000 agütsü.

HSLC nung tematiba kaketshir asemji Govt. Hr. Sec. School, Peren nungi Igumule Telia, Govt. High School, Khar nungi Imtiyala aser Govt. High School, Naharbari nungi

Kongkor Boro nung lir.

HSSLC Science stream nung tematiba kaketshir asemji Mayangnokcha Govt. Hr. Sec. School, Mokokchung nungi dang Limsowa Jamir, Wangshizenla aser Rongchensenla Yar nung lir.

Arts stream nung GHSS, Jotsoma nungi Vikhono Senotsu, GHSS, Sechu nungi Asieno Kielienyu aser GHSS, Medziphema nungi Julie Giri nung lir.

Commerce stream nungi Govt. Hr. Sec. School, Jotsoma nungi Kezhazetuo Nagi,

Mayangnokcha Govt. Hr. Sec. School, Mokokchung nungi Temjenlemla Yim aser Rüzühkhrie Govt. Hr. Sec. School, Kohima nungi Mesu U Koza nung lir.

Directorate of School Education-isa HSLC aser HSSLC 2025 examinations nung kaketshir 5 tema aliba sorkar school temi 100% pass percentage anguba atema tetushi agüja liasü.

Government high schools 20 aser Higher Secondary Schools 3 nem perfect pass percentages atema tetushi agütsü.

BILEMDANGANG

"Nai ashiba shidak ta agizükba nisung dak nungi na kecha mangazüktsü."